

Bishita di Su Alteza Real Prinses Laurentien na A.T.A.:

Fuera di “Raad van Kinderen” a discuti un iniciativa nobo dirigi riba nos muchanan



DURANTE un encuentro ameno diadomingo ultimo, representantenan di Aruba Tourism Authority conhuntamente cu varios socio involvi den e plataforma di “Raad van Kinderen” incluyendo Aruba Investment Bank, maestronan di scol, representantenan di Ministerio di Educacion, Global Shapers a reuni hunto cu SAR Prinses Laurentien, kende a bishita nos isla pa varios encuentro. E Princes a presenta un idea nobo n’esnan presente: “Kids Moving the World”.

SAR Prinses Laurentien a introduci “Raad van Kinderen” bou di fundacion ‘Missing Chapter Foundation’ (MCF) cu el a funda na aña 2010. Esaki a wordo funda cu e meta pa trece opinion di muchanan mas serca di organisacionnan cu tin un impacto grandi den nos comunidad, y di e manera aki garantizando un futuro mas sostenibel cu participacion di nos muchanan.

Na Aruba varios organisacion ta forma parti di “Raad van Kinderen”, incluyendo A.T.A. Esaki ta unda e muchanan mes ta yuda pensa structuralmente hunto cu organisacionnan riba diferente tema y duna posibel solucion riba dilemanan cu organisacionnan ta enfrenta y ta presenta na nan.

Un di SAR Prinses Laurentien su deseonan pa medio di “Kids Moving the World” ta pa “empower” nos muchanan. Asina a bin n’e idea di un fondo cu ta laga nan ta involvi den escogo e proyectonan cu nan ta haña tin balor agrega pa nos medio ambiente, comunidad of industria turistico.

E fondo aki ta permita nan carga responsabilidnan, mas aleu di local e plataforma di “Raad van Kinderen” ta brinda nan. Asina laga nan bos resona mas y confia cu nan ta “change makers” cu nos mester.

T’e intencion pa lansa “Kids Moving the World” na Aruba y despues introduci esaki na otro paisnan.

Claro cu lo sigura cu e guia y training t’ey pa nos muchanan p’asina nan por carga nan responsabilidad debidamente.

A papia di diferente otro idea unda y di ki manera por involvi muchanan den diferente trayecto. A.T.A. mes a duna un presentacion cu diferente proyecto dirigi riba nos muchanan, ambos e mucha cu ta bishita y esun cu ta biba aki.

E “Very Important Kid Program” ta un ehempel di con A.T.A. ta atrae muchanan y ta sigura cu ta entusiasma nan pa bishita diferente sitio cu A.T.A. kier pa nan y nan mayornan conoce.

Esaki ta haci pa medio di un “Very Important Kid Passport” p.e., unda mester muestra cu nan a bishita tur e sitio.

A papia riba e “Aruba Certification Junior Program” dirigi riba muchanan, pa amplia nan conocimiento di Aruba y Turismo pa medio di e. o. un tour cu e muchanan.

Turismo como curiculo na scolnan ta algo cu tur a subraya como importante, y algo pa cual A.T.A. ta den contacto cu esnan concerni. A elabora riba introduccion di un guia pa muchanan cu ta bishita Aruba, traha dor di muchanan di Aruba, asina ki nan ta conta e storia di nos isla.

A.T.A. a introduci e buki Benchi cu Lina aña pasa, cual ta dirigi riba nos muchanan di scol y riba amplia nan conocimiento di nos turismo.

A.T.A. ta orguyoso di por forma parti di un iniciativa manera esun di “Raad van Kinderen” y pronto “Kids Moving the World” cu ta muestra di por tin un impacto positivo riba nos comunidad, y nos muchanan.

Ademas A.T.A. ta gradici p’e bishita y di por a forma parti di e discusion diadomingo ultimo hunto cu diferente socio presente.